

大般若波羅蜜多經卷第四百六十七

唐三藏法師玄奘奉 詔譯

第二分無相品第七十四之二

復次善現。諸菩薩摩訶薩。行深般若波羅蜜多時。能以離相無漏之心。受持淨戒。謂聖無漏道支所攝。法爾所得善清淨戒。如是淨戒。無缺無隙。無瑕無穢。無所取著。應受供養智者所讚。由此淨戒。於一切法無所取著。謂不取著色。受想行識。不取著眼處。乃至意處。不取著色處。乃至法處。不取著眼界。乃至意識界。不取著色界。乃至法界。不取著眼識界。乃至意識界。不

取著三十二大士相八十隨好。不取著刹帝利大族。婆羅門大族。長者大族。居士大族。不取著四大王眾天。乃至他化自在天。不取著梵眾天。乃至色究竟天。不取著空無邊處天。乃至非想非非想處天。不取著預流果。乃至獨覺菩提。不取著轉輪王位。及餘小王宰官等位。但以如是所受持戒。與諸有情平等共有。迴向無上正等菩提。於迴向時。以無相無所得無二爲方便。非有相有所得。有二爲方便。但由世俗。不由勝義。由此因緣。一切佛法無不圓滿。是菩薩摩訶薩。由此淨戒波羅蜜多方便善巧。起四靜慮。勝進分無。

染著。爲方便故。引諸神通。是菩薩摩訶薩。用異熟生清淨天眼。恆見十方無邊世界。現在諸佛。安隱住持。爲諸有情宣說正法。乃至證得一切智智。於所見事。能不忘失。是菩薩摩訶薩。用超過人清淨天耳。恆聞十方無邊世界諸佛說法。乃至證得一切智智。於所聞事。能不忘失。隨所聞法。能作自他諸利樂事。無空過者。是菩薩摩訶薩。用他心智能知十方佛及諸有情。心心所法。知已。能起一切有情諸利樂事。是菩薩摩訶薩。用宿住智。知諸有情先所造業。由所造業。不失壞故。生彼彼處。受諸苦樂。知已。爲說本業因緣。令

其憶知。作饒益事。是菩薩摩訶薩。用漏盡智。安立有情。或令住預流果。或令住一來果。或令住不還果。或令住阿羅漢果。或令住獨覺菩提。或令住菩薩勝位。或令住一切智智。以要言之。是菩薩摩訶薩。在所生處。隨諸有情。堪能差別方便。令住勝善品中。如是善現。諸菩薩摩訶薩。行深般若波羅蜜多時。由離諸相。無漏心力。能於無相無作法中。圓滿淨戒波羅蜜多。亦能圓滿諸餘功德。復次善現。諸菩薩摩訶薩。行深般若波羅蜜多時。能以離相無漏之心。而修安忍。是菩薩摩訶薩。從初發心。乃至安坐妙菩提座。其中假

使一切有情各持種種刀仗瓦石競來加害。是菩薩摩訶薩不起一念忿恨之心。爾時菩薩應修二忍。云何爲二。一者應受一切有情罵辱加害。不生忿恨。伏瞋恚忍。二者應起無生法忍。是菩薩摩訶薩若遭種種惡言罵辱。或遭種種刀仗加害。應審思察。誰能罵辱。誰能加害。誰受罵辱。誰受加害。誰起忿恨。誰應忍受。復應審察一切法性。皆畢竟空。法尙不可得。況當有法性。尙無法性。況有有情。如是觀時。若能罵辱。若所罵辱。若能加害。若所加害。皆無所有。乃至分割截身支。其心安忍。都無異念。於諸法性如實觀察。復

能證得無生法忍。云何名爲無生法忍。謂令一切煩惱不生。微妙智慧。常無閒斷。及觀諸法。畢竟不生。是故名爲無生法忍。是菩薩摩訶薩。安住如是二種忍中。速能修滿布施波羅蜜多。乃至般若波羅蜜多。速能修滿四念住。乃至八聖道支。速能修滿四靜慮。四無量。四無色定。速能修滿八解脫。乃至十徧處。速能修滿空無相無願解脫門。速能修滿諸菩薩地。速能修滿一切陀羅尼門。三摩地門。速能修滿五眼六神通。速能修滿如來十力。乃至十八不共法。速能修滿無忘失法。恆住捨性。速能修滿一切智道。相智一

切相智。速能修滿三十二大士相八十隨好。是菩薩摩訶薩。安住如是諸佛法已。於聖無漏出世不共一切聲聞獨覺神通。皆得圓滿。安住如是勝神通已。以淨天眼。恆見十方無邊世界。現在諸佛。安隱住持。爲諸有情宣說正法。乃至證得一切智智。起佛隨念。常無閒斷。以淨天耳。恆聞十方諸佛說法。聞已受持。常不忘失。爲諸有情如實宣說。以他心智能正測量諸佛世尊心。心所法。亦能正知。菩薩獨覺及諸聲聞心。心所法。亦能正知。餘有情類心。心所法。隨其所應。爲說正法。令生勝解。以宿住智。知諸有情宿種善根種。

種差別。知已方便示現。勸導讚勵慶喜。令獲殊勝利。益安樂。以漏盡智。隨其所應。安立有情於三乘法。令得解脫。生老病死。是菩薩摩訶薩。行深般若波羅蜜多。成就殊勝方便善巧。嚴淨佛土。成熟有情。速能具足一切相智。證得無上正等菩提。轉妙法輪。度有情眾。如是善現。諸菩薩摩訶薩。行深般若波羅蜜多時。由離諸相。無漏心力。能於無相無作法中。圓滿安忍。波羅蜜多。亦能圓滿諸餘功德。復次善現。諸菩薩摩訶薩。行深般若波羅蜜多時。能以離相無漏之心。而修精進。是菩薩摩訶薩。成就勇猛身心精進。由此能

入初靜慮具足住。乃至能入第四靜慮具足住。依四靜慮起無量神通變現。乃至以手摩捫日月。自在迴轉。不以為難。成就勇猛身精進故。以神通力。經須臾頃。能至十方。殑伽沙等諸佛世界。復以種種飲食衣服。臥具醫藥。及餘資具。恭敬供養。尊重讚歎。現說正法。諸佛世尊。由此善根。果報無盡。乃至證得一切智智。由此善根。增上勢力。得成佛已。復為無量世間天人阿素洛等。以無量種飲食衣服。臥具醫藥。及餘資具。恭敬供養。尊重讚歎。由此善根。增上勢力。般涅槃後。自設利羅及諸弟子。猶為無量世間天人阿素

洛等恭敬供養尊重讚歎。是菩薩摩訶薩。復以神力。能至十方殑伽沙等諸佛世界。於諸佛所。聽聞正法。聞已受持。乃至無上正等菩提。終不忘失。是菩薩摩訶薩。復以神力。能至十方殑伽沙等諸佛世界。成熟有情。嚴淨佛土。精勤修學。一切智智。得圓滿已。證得無上正等菩提。轉妙法輪。度有情眾。如是善現。諸菩薩摩訶薩。行深般若波羅蜜多。成就勇猛身精進故。能令精進波羅蜜多。疾得圓滿。復次善現。諸菩薩摩訶薩。行深般若波羅蜜多。成就勇猛心精進故。速能圓滿諸聖無漏道。及道支所攝精進波羅蜜多。由此

能令一切不善身語意業。無容得起。是菩薩摩訶薩。於諸法中。終不取著。若常若無常。若樂若苦。若我若無我。若淨若不淨。若寂靜若不寂靜。若遠離若不遠離。若有爲界。若無爲界。若欲界。若色界。若無色界。若有漏界。若無漏界。若四靜慮。四無量。四無色定。若四念住。四正斷。四神足。五根。五力。七等覺支。八聖道支。若空無相無願解脫門。若布施波羅蜜多。乃至般若波羅蜜多。若內空。乃至無性。自性空。若眞如。乃至不思議界。若苦集滅道聖諦。若八解脫。八勝處。九次第定。十徧處。若淨觀地。乃至如來地。若極喜地。乃至法

雲地。若一切陀羅尼門。一切三摩地門。若五眼六神通。若如來十力。乃至十八不共法。若三十二大士相。八十隨好。若無忘失法。恆住捨性。若一切智道。相智。一切相智。若無常苦空無我。若預流果。一來果。不還果。阿羅漢果。獨覺菩提。若一切菩薩摩訶薩行。諸佛無上正等菩提。是菩薩摩訶薩。亦不取著。是預流。是一來。是不還。是阿羅漢。是獨覺。是菩薩。是如來。亦不取著。如有情下法所顯。如有情中法所顯。如有情上法所顯。如有情上分所顯。如有情下分所顯。如有情聲聞乘所顯。如有情獨覺乘所

顯。如是有情無上乘所顯。是菩薩摩訶薩。於如是等法及有情。皆不取著。所以者何。所取著法。及諸有情。皆無自性。可取著故。是菩薩摩訶薩。成就勇猛心精進故。雖恆造作一切有情諸利樂事。而於有情都無所得。雖常圓滿所修精進波羅蜜多。而於精進波羅蜜多。都無所得。雖常圓滿一切佛法。而於佛法都無所得。雖常嚴淨一切佛土。而於佛土都無所得。是菩薩摩訶薩。成就如是身心精進。雖能遠離一切惡法。亦能攝受一切善法。而無取著。無取著故。從一佛國。至一佛國。從一世界。至一世界。爲欲饒益諸有情故。

所欲示現諸神通事。皆能自在示現無礙。謂或示現雨眾妙花。散眾名香。作眾妓樂。現雲雷音。震動大地。或復示現眾妙七寶莊嚴世界。身放光明。照諸盲冥。身出妙香。令臭穢者皆得香潔。或復示現設大祠祀。於中不惱諸有情類。因斯化導無量有情。令人正道。離斷生命。乃至邪見。或以布施乃至般若。攝諸有情。爲欲饒益諸有情故。或捨財寶。或捨妻子。或捨王位。或捨支節。或捨身命。隨諸有情。應以如是如是方便。而得饒益。卽以如是如是方便。而饒益之。如是善現。諸菩薩摩訶薩。行深般若波羅蜜多時。由離諸相無。

漏心力。能於無相無作法中。圓滿精進波羅蜜多。亦能圓滿諸餘功德。復次善現。諸菩薩摩訶薩。行深般若波羅蜜多時。能以離相無漏之心而修靜慮。是菩薩摩訶薩。除諸佛定。於諸餘定。皆能圓滿。是菩薩摩訶薩。離欲惡不善法。有尋有伺。離生喜樂。入初靜慮。具足而住。如是乃至斷樂斷苦。先喜憂沒。不苦不樂。捨念清淨。入第四靜慮。具足而住。是菩薩摩訶薩。以慈俱心。普緣一方。乃至十方。一切世間。具足而住。如是乃至以捨俱心。普緣一方。乃至十方。一切世間。具足而住。是菩薩摩訶薩。超諸色想。滅有對想。不思惟。

種種想入無邊空空無邊處具足而住。如是乃至超一切種無所有處入非想非非想處具足而住。是菩薩摩訶薩安住靜慮波羅蜜多於八解脫八勝處九次第定十徧處能順逆入具足而住。是菩薩摩訶薩能於空無相無願解脫門具足而住。能於無閒三摩地如電三摩地聖正三摩地金剛喻三摩地具足而住。是菩薩摩訶薩安住靜慮波羅蜜多修三十七菩提分法及道相智皆令圓滿。用道相智攝受一切三摩地已漸次修超淨觀地乃至獨覺地證入菩薩正性離生。既入菩薩正性離生修諸地行圓滿佛地。是

菩薩摩訶薩。雖於諸地漸次修超。而於中間不取果證。乃至未得一切智智。是菩薩摩訶薩。安住靜慮波羅蜜多。從一佛國趣一佛國。恭敬供養尊重讚歎諸佛世尊。於諸佛所植眾善本。成熟有情。嚴淨佛土。從一世界趣一世界。饒益有情。身心無倦。或以布施。或以淨戒。或以安忍。或以精進。或以靜慮。或以般若。波羅蜜多。攝諸有情。或以戒蘊。或以定蘊。或以慧蘊。或以解脫蘊。或以解脫智見蘊。攝諸有情。或教有情住預流果。或住一來果。或住不還果。或住阿羅漢果。或住獨覺菩提。或住菩薩摩訶薩位。或住無上正等菩

提隨諸有情善根勢力。善法增長。種種方便。令其安住。是菩薩摩訶薩。安住靜慮波羅蜜多。能引一切陀羅尼門三摩地門。能得殊勝四無礙解。異熟神通。是菩薩摩訶薩。成就殊勝異熟神通。決定不復入於母胎。受諸欲樂。攝受生乘生過所染。所以者何。是菩薩摩訶薩。善見善知一切法性。皆如幻化。雖知諸行皆如幻化。而乘悲願。饒益有情。雖乘悲願。饒益有情。而達有情及彼施設。皆不可得。雖達有情及彼施設。皆不可得。而能安立一切有情。令其安住。不可得法。此依世俗。不依勝義。是菩薩摩訶薩。安住靜慮波羅蜜

多修行一切靜慮解脫等持等至。乃至圓滿所求無上正等菩提。常不捨離所修靜慮波羅蜜多。是菩薩摩訶薩。行道相智。方便引發一切相智。安住其中。永斷一切習氣相續。能正自利。亦正利他。能與一切世間天人阿素洛等。作淨福田。堪受世閒供養恭敬。如是善現。諸菩薩摩訶薩。行深般若波羅蜜多時。由離諸相無漏心力。能於無相無作法中。圓滿靜慮波羅蜜多。亦能圓滿諸餘功德。復次善現。諸菩薩摩訶薩。行深般若波羅蜜多時。能以離相無漏之心。而修般若。是菩薩摩訶薩。不見少法實有成就。謂不見色實。

有成就。不見受想行識實有成就。不見色生。不見受想行識生。不見色滅。不見受想行識滅。不見色是增益門。不見受想行識是增益門。不見色是損減門。不見受想行識是損減門。不見色有積集。不見受想行識有積集。不見色有離散。不見受想行識有離散。如是乃至不見一切有漏法實有成就。不見一切無漏法實有成就。不見一切有漏法生。不見一切無漏法生。不見一切有漏法滅。不見一切無漏法滅。不見一切有漏法是增益門。不見一切無漏法是增益門。不見一切有漏法是損減門。不見一切無漏法是損減門。

門不見一切有漏法有積集。不見一切無漏法有積集。不見一切有漏法有離散。不見一切無漏法有離散。如實觀色是虛妄不堅實。無自性。如實觀受想行識是虛妄不堅實。無自性。如是乃至如實觀一切有漏法是虛妄不堅實。無自性。如實觀一切無漏法是虛妄不堅實。無自性。是菩薩摩訶薩。如是觀時。不得色自性。不得受想行識自性。如是乃至不得一切有漏法自性。不得一切無漏法自性。是菩薩摩訶薩。行深般若波羅蜜。多如是觀時。於一切法深生信解。皆以無性而爲自性。於如是事生信解。已能行內空。乃

至能行無性自性空。如是行時。於一切法無所執著。謂不執著色。不執著受想行識。不執著眼處。乃至意處。不執著色處。乃至法處。不執著眼界。乃至意識界。不執著色界。乃至法界。不執著眼識界。乃至意識界。不執著眼觸。乃至意觸。不執著眼觸爲緣所生諸受。乃至意觸爲緣所生諸受。不執著地界。乃至識界。不執著因緣。乃至增上緣。不執著無明。乃至老死。不執著布施波羅蜜多。乃至般若波羅蜜多。不執著內空。乃至無性自性空。不執著眞如。乃至不思議界。不執著苦集滅道聖諦。不執著四念住。乃至八聖道支。不執

著四靜慮。四無量。四無色定。不執著八解脫。乃至十徧處。不執著空無相無願解脫門。不執著淨觀地。乃至如來地。不執著極喜地。乃至法雲地。不執著一切陀羅尼門。三摩地門。不執著五眼六神通。不執著如來十力。乃至十八不共法。不執著三十二大士相。八十隨好。不執著無忘失法。恆住捨性。不執著一切智道相智。一切相智。不執著預流果。乃至獨覺菩提。不執著一切菩薩摩訶薩行。不執著諸佛無上正等菩提。是菩薩摩訶薩行。無所有甚深般若波羅蜜多。時能圓滿菩薩道。謂能圓滿六波羅蜜多。亦能圓滿。

內空乃至無性自性空亦能圓滿眞如乃至不思議
界亦能圓滿苦集滅道聖諦亦能圓滿四念住乃至
八聖道支亦能圓滿四靜慮四無量四無色定亦能
圓滿八解脫乃至十徧處亦能圓滿空無相無願解
脫門亦能圓滿諸菩薩地亦能圓滿一切陀羅尼門
三摩地門亦能圓滿五眼六神通亦能圓滿如來十
力乃至十八佛不共法亦能圓滿無忘失法恆住捨
性亦能圓滿一切智道相智一切相智亦能圓滿三
十二大士相八十隨好是菩薩摩訶薩圓滿如是菩
薩道已復能圓滿離暗佛道謂能圓滿六波羅蜜多

及餘無量無邊佛法。是菩薩摩訶薩。安住如是離暗
佛道。引發殊勝異熟神通。隨諸有情。應以布施乃至
般若而攝受者。卽以布施乃至般若而攝受之。應以
戒蘊定蘊慧蘊解脫蘊解脫智見蘊而攝受者。卽以
戒蘊乃至解脫智見蘊而攝受之。應令安住預流果。
或一來果。或不還果。或阿羅漢果。或獨覺菩提。或復
無上正等菩提者。卽方便令安住預流果。乃至無上
正等菩提。是菩薩摩訶薩。能作種種神通變化。欲往
殑伽沙等世界。隨意能往。欲現所往諸世界中種種
珍寶。隨意能現。欲令所往諸世界中有情受用種種

珍寶隨其所樂皆令充足。是菩薩摩訶薩。從一世界往一世界。利益安樂無量有情。見諸世界種種妙好莊嚴之相。能自攝受隨意所樂莊嚴佛土。譬如他化自在諸天。諸有所須眾妙樂具。隨心而現。如是菩薩隨意攝受種種莊嚴無量佛土。此所攝受諸佛土中微妙清淨離襍染法。隨意所欲悉皆能現。是菩薩摩訶薩。由異熟生布施波羅蜜多。乃至般若波羅蜜多。由異熟生諸妙神通。由異熟生菩薩道故。行道相智。由道相智得成熟故。復能證得一切相智。由得此智於一切法無所攝受。謂不攝受色。亦不攝受受想行。

識。如是乃至亦不攝受。若善法。若非善法。若有記法。若無記法。若世間法。若出世間法。若有漏法。若無漏法。若有爲法。若無爲法。亦不攝受。所證無上正等菩提。亦不攝受。一切佛土所受用物。其中有情。於一切法。亦無攝受。所以者何。是菩薩摩訶薩。先不攝受一切法故。於一切法。無所得故。爲諸有情。無倒宣說一切法性。無攝受故。如是善現。諸菩薩摩訶薩。行深般若波羅蜜多時。由離諸相。無漏心力。能於無相無作法中。圓滿般若波羅蜜多。亦能圓滿諸餘功德。

第二分無襪品第七十五之一

爾時具壽善現白佛言。世尊。云何於一切無襍無相。自相空法中。能圓滿六波羅蜜多。云何以一切無差別法中。而施設差別。云何了知如是諸法差別之相。云何於般若波羅蜜多中。能攝受一切六波羅蜜多。如是乃至攝受一切世出世法。云何於一切異相法中。施設一相。所謂無相。及於一相無相法中。施設一切差別法相。佛告善現。諸菩薩摩訶薩。行深般若波羅蜜多時。安住如夢。如響。如像。如光影。如陽燄。如幻。如化。五取蘊中。爲諸有情。布施持戒安忍精進修定學慧如實了知如夢。乃至如化五蘊。皆同一相。所謂

無相。所以者何。夢乃至化。皆無自性。若法無自性。是法則無相。若法無相。是法一相。所謂無相。由此因緣。當知一切施者受者。施物施性。施果施緣。皆同無相。若如是知而行布施。則能圓滿所行布施波羅蜜多。若能圓滿所行布施波羅蜜多。則不遠離淨戒安忍。精進靜慮般若波羅蜜多。安住此六波羅蜜多。則能圓滿四靜慮四無量四無色定。亦能圓滿四念住乃至八聖道支。亦能圓滿三解脫門。亦能圓滿內空乃至無性自性空。亦能圓滿真如乃至不思議界。亦能圓滿苦集滅道聖諦。亦能圓滿八解脫乃至十徧處。

亦能圓滿諸菩薩地。亦能圓滿五百陀羅尼門。五百三摩地門。亦能圓滿五眼六神通。亦能圓滿如來十力。乃至十八不共法。亦能圓滿無忘失法。恆住捨性。亦能圓滿一切智道相智一切相智。是菩薩摩訶薩。安住如是諸異熟聖無漏法中。能往十方殑伽沙等諸佛世界。以無量種上妙供具。恭敬供養。尊重讚歎諸佛世尊。作諸有情利益安樂。應以布施乃至般若波羅蜜多。而攝受者。卽以布施乃至般若波羅蜜多。而攝受之。應以諸餘種種善法。而攝受者。卽以諸餘種種善法。而攝受之。是菩薩摩訶薩。成就一切殊

勝善根。於一切法。皆得自在。雖受生死。不爲生死過失所染。爲欲利樂諸有情故。攝受人天富貴自在。由此富貴自在威力。能作有情諸饒益事。以四攝事而攝受之。是菩薩摩訶薩。知一切法皆無相故。雖知預流果。而不住預流果。乃至雖知獨覺菩提。而不住獨覺菩提。所以者何。是菩薩摩訶薩。如實了知一切法已。爲欲證得一切智智。不共一切聲聞獨覺。如是善現諸菩薩摩訶薩。知一切法皆無相故。如實了知布施等六波羅蜜多。及餘無量無邊佛法。皆同無相。由此因緣。普能圓滿一切佛法。便能證得一切智智。復

次善現。諸菩薩摩訶薩。行深般若波羅蜜多時。安住如夢。如響。如像。如光影。如陽燄。如幻。如化。五取蘊中。圓滿淨戒。波羅蜜多。是菩薩摩訶薩。如實了知。如夢。乃至如化。五蘊。便能圓滿。無相淨戒。波羅蜜多。如是淨戒。無缺。無隙。無瑕。無穢。無所取著。應受供養。智者所讚。妙善受持。妙善究竟。是聖無漏。是出世間道支所攝。安住此戒。能善受持。受施設戒。法爾得戒。律儀戒。有表戒。無表戒。現行戒。不現行戒。威儀戒。非威儀戒。是菩薩摩訶薩。雖具成就。如是諸戒。而於諸法。無所取著。不作是念。我由此戒。當生刹帝利大族。或婆

羅門大族。或長者大族。或居士大族。富貴自在。不作是念。我由此戒。當爲小王。或爲大王。或爲輪王。或爲輔佐。富貴自在。不作是念。我由此戒。當生四大王眾天。乃至他化自在天。富貴自在。不作是念。我由此戒。當得預流果。或一來果。或不還果。或阿羅漢果。或獨覺菩提。或入菩薩正性離生。或得菩薩無生法忍。或得無上正等菩提。所以者何。如是諸法。皆同一相。所謂無相。無住無得。無相之法。不得無相。有相之法。不得有相。無相之法。不得有相。有相之法。不得無相。由是因緣。都無所得。如是善現。諸菩薩摩訶薩。行深般若。

若波羅蜜多時。速能圓滿無相淨戒波羅蜜多。既能
圓滿無相淨戒波羅蜜多。速入菩薩正性離生。既入
菩薩正性離生。復得菩薩無生法忍。既得菩薩無生
法忍。修行道相智。趣一切相智。得異熟五神通。復得
五百陀羅尼門。亦得五百三摩地門。安住此中。復能
證得四無礙解。從一佛國至一佛國。親近供養諸佛
世尊。成熟有情。嚴淨佛土。是菩薩摩訶薩。爲化有情。
雖現流轉諸趣生死。而不爲彼過失所染。如幻化人。
雖現行住坐臥等事。而無眞實往來等業。雖現種種
饒益有情。而於有情及彼施設。都無所得。如有如來

應正等覺。名善寂靜。證得無上正等菩提。轉妙法輪。度無量眾。令出生死。證得涅槃。而無有情堪受。決得無上正等菩提記者。時彼如來。化作化佛。令久住世。自捨壽行。入無餘依般涅槃界。彼佛化身住一劫已。授一菩薩無上正等菩提記已。方入涅槃。彼佛化身。雖作種種饒益有情事。而無所得。謂不得色受想行識。乃至不得一切有漏無漏等法。及諸有情。是菩薩摩訶薩。亦復如是。雖有所作而無所得。如是善現。諸菩薩摩訶薩。行深般若波羅蜜多時。圓滿淨戒波羅蜜多。由此淨戒波羅蜜多。得圓滿故。便能攝受一切。

佛法因斯證得一切智智。復次善現。諸菩薩摩訶薩。行深般若波羅蜜多時。安住如響如像。如光影。如陽燄。如幻如化。五取蘊中。圓滿安忍波羅蜜多。是菩薩摩訶薩。如實了知如夢。乃至如化五蘊。便能圓滿無相安忍波羅蜜多。善現。云何菩薩摩訶薩。行深般若波羅蜜多時。如實了知如夢。乃至如化五蘊。便能圓滿無相安忍波羅蜜多。善現。是菩薩摩訶薩。如實了知是五取蘊無實相故。修二種忍。便能圓滿無相安忍波羅蜜多。云何爲二。謂安受忍及觀察忍。安受忍者。謂諸菩薩從初發心。乃至安坐妙菩提座。於

其中間假使一切有情之類。競來訶毀。以麤惡言罵詈凌辱。復以瓦石刀仗加害。是時菩薩爲滿安忍波羅蜜多。乃至不生一念忿恨。亦復不起加報之心。但作是念。彼諸有情。深可哀愍。增上煩惱。擾動其心。不得自在。於我發起如是惡業。我今不應瞋恨於彼。復作是念。由我攝受怨家諸蘊。令彼有情。於我發起如是惡業。但應自責。不應瞋彼菩薩。如是審觀察時。於彼有情。深生慈愍。如是等類。名安受忍。觀察忍者。謂諸菩薩。作是思惟。諸行如幻。虛妄不實。不得自在。亦如虛空。無我有情。命者生者養者。士夫補特伽羅。意

生。儒童作者受者。知者見者。皆不可得。唯是虛妄分別所起。一切皆是自心所變。誰呵毀我。誰罵詈我。誰凌辱我。誰以種種瓦石刀仗加害於我。誰復受彼凌辱加害。皆是自心虛妄分別。我今不應橫起執著。如是諸法。由自性空勝義空故。都無所有。菩薩如是審觀察時。如實了知諸行空寂。於一切法不生異想。如是等類。名觀察忍。是菩薩摩訶薩修習如是二種忍故。便能圓滿無相安忍。波羅蜜多。由能圓滿無相安忍。波羅蜜多。即便獲得無生法忍。具壽善現白言。世尊。云何名爲無生法忍。此何所斷。復是何智。佛告善

現由此勢力。乃至少分惡不善法。亦不得生。是故名爲無生法忍。此令一切我及我所慢等煩惱。畢竟不生。如實忍受諸行如夢。乃至如化。此忍名智。得此智故。說名獲得無生法忍。具壽善現復白佛言。聲聞獨覺及諸菩薩。無生法忍。有何差別。佛告善現。諸預流者。若智若斷。乃至獨覺。若智若斷。亦名菩薩摩訶薩。忍復有菩薩摩訶薩。謂忍諸法。畢竟不生。是爲差別。善現。當知諸菩薩摩訶薩。成就如是殊勝忍故。超勝一切聲聞獨覺。諸菩薩摩訶薩。安住如是異熟忍中。行菩薩道。能圓滿道相智。成就如是道相智故。常

不遠離四念住。乃至八聖道支。亦不遠離三解脫門。亦不遠離異熟神通。由不遠離異熟神通。從一佛國。趣一佛國。親近供養諸佛世尊。成熟有情。嚴淨佛土。作是事已。用一刹那相應般若。證得無上正等菩提。如是善現。諸菩薩摩訶薩。行深般若波羅蜜多時。疾能圓滿無相安忍波羅蜜多。由此安忍波羅蜜多。得圓滿故。便能圓滿一切佛法。因斯證得一切智智。

大般若波羅蜜多經卷第四百六十七